

Nimale sto dźěći w lěhwje SŠT

Wot zašłego pjatka hač do tuteje nje-dźele wotměwa Serbske šulske towarstwo (SŠT) rěčne a prózdninske lěhwo we Wodowych Hendrichcach. Milenka Rječcyna je so z nawodnicu Marlis Młynkowej rozmołwjała.

Kelko dźěći je so lětsa přizjewiło?

■ **M. Młynkowa:** Přizjewiło je so lětsa 90 dźěći a wone su so wšitke sobu na puć podali. W cyłku mamy a změjemy tež klětu sto městnow. Tale ličba je so w zašłych lětach jako dobra wopokazała.

Zwotkel dźěći přichadžeja?

■ **M. Młynkowa:** Mjez nimi su šulerjo bywšeho 4. do 7. lětnika. Woni chodźachu do zakładneje šule Ralbicy, Worklecy, Radwor, Chróscicy a Pančicy-Kukow kaž tež do wyšeje šule Radwor, Worklecy, Ralbicy a do Budyskeho Serbskeho gymnazija.

Hłowne ćežišćo poskitka je, přidatny serbski rěčny rum wutworić. Kotry rěčny niwow dźěći maja?

■ **M. Młynkowa:** Wjetšina dźěći rěči na maćernorěčnym niwowje. Mjez nimi pak su tež serbšćinu wuknjacy. Rěčimy serbsce, tež hdyž tu a tam němsku wotmołwu abo prašenje slyšimy. Štož mje jara wjeseli je, zo dźěći z Radworja samozrozumliwje serbsce rěča.

Što wšitko planujeće?

■ **M. Młynkowa:** Wosebje woblubowana za wočerstwjenje je susodna kupjel. Po zwučenym wašnju pak mamy wšelake dalše poskitki. Džensa rěči Matej Džiślawk wo fotografowanju, srjedu hrajemy z Měrkom Brankačkom dźiwadlo a pjatk podamy so z Michałom Cyžom na geocaching.

Maja dźěći zaso někajki nadawk spjelnić?

■ **M. Młynkowa:** W přěnim rjedže so dźěći wočerstwja. Mamy pak tež skupinske dźěło, kotrež Fabian Hejduška nawjeduje. Kóžda z dźewječ skupinow ma na tři podate zapřijeća něhdže tři minuty dołhi wideofilm wjerćeć, štož je dosć naročny a kreatiwny nadawk.

Kak je financowanje přebytko rjadowane?

■ **M. Młynkowa:** Hłowny podźěl na financowanju ma wospjet Założba za serbski lud. Zdobom smy wobdźelenski pjenjez zběrali. Lětsa su starši wyšich plaćiznow dla wo 20 eurow wjace hač loni, to rěka 200 eurow za přebytk zaplaćili.